

四庫全書

集部

欽定四庫全書

集部

臨川文集卷十一  
四

詳校官庶吉士臣龍廷槐

檢討臣何思鈞覆勘

覆校官中書臣呂雲棟

校對官主簿臣汪日贊

謄錄舉人臣曹夢齡

欽定四庫全書

臨川文集卷十一

宋 王安石 撰

古詩

寄題郢州白雪樓

聖俞為狄梁公孫作詩要予同作

蒙亭

和王樂道烘蟲

和聖俞農具詩十五首

次韻酬微之贈池紙并詩

酬沖卿月晦夜有感

送子思兄參惠州軍

送董伯懿歸吉州

八月十九日試院夢沖卿

平甫歸飲

荅陳正叔

過食新城藕

明州錢君倚衆樂亭

愛日

荅裴煜道中見寄

餘寒

孤城

和微之藥名勸酒

客至當飲酒二首

乙未冬婦子病至春未已

强起

飲裴侯家

送謝師宰赴任楚州二首

次韻遊山門寺望文春山

車螯

疥

寄題郢州白雪樓

折楊黃芩笑者多陽春白雪和者少知音四海無幾人

况乃區區郢中小千載相傳始欲慕一時獨唱誰能曉  
古心以此分冥冥俚耳至今徒擾擾朱樓碧瓦何年有  
榱桷連空欲驚矯郢人爛漫醉浮雲郢女參差躡飛鳥  
丘墟餘響難再得欄檻茲名復誰表我來欲歌聲更吞  
石城寒江暮雲繞

聖俞為狄梁公孫作詩要予同作

虎豹不食子鵲巢不乘雄人惡甚鳥獸吾能與成功愛  
有以計留去有勢不容吾謀適合意幾亦齒奸鋒時思

淪九泉褒取異代忠堂堂社稷臣近世孰如公空使苗裔孫稱揚得詩翁一讀亦使我慨然想餘風

蒙亭

隱者委所逢在物無不足山林與城市語道歸一轍詩人論巨細此指尚局束頗知區區者自屏忍所欲孰識古之人超然遺耳目豈於喧與靜趣舍有偏獨命亭今何為似乃畏驚俗至意不標揭小名聊自屬夏風簷楹寒冬雪牕戶煥春樊亂梅柳秋徑深松菊壺觴日笑傲



裙屐相追逐此樂已難言持琴作新曲

和王樂道烘蟲

秋暑汗流如炙輶敝衣濕蒸塵垢浣施施衆蟲當此時  
擇肉甘於虎狼餓咀嚙侵膚未云已爬搔次骨終無那  
時時對客輒自捫千百所除纔幾個皮毛得氣強復活  
爪甲流丹真暫破未能湯沐取一空且以火攻令少挫  
踞爐熾炭已不暇對竈張衣誠未過飄零乍若蛾赴燈  
驚擾端如蟻旋磨欲毆百惡死焦灼肯貸一凶生棄播

已觀細黠無所容未放老奸終不墮然臍郿塢患溢世  
焚寶鹿臺身易貨冢中燎入化秦屍池上炊隨遷莽坐  
彼皆勢極就烟埃况汝命輕倖涕唾逃藏壞絮尚欲索  
埋沒死灰誰復課一本無此八句熏心得禍爾莫悔爛額收功  
吾可賀猶殘衆蟻恨未除自計寧能久安卧

和聖俞農具詩十五首

田廬

田父結田廬聊容一身息呼兒取茅竹不借鄉人力起

行廬旁朝歸卧廬下夕悠悠各有願勿笑田廬窄

樵斧

百金聚一冶所賦以所遭此豈異莫耶奈何獨當樵朝  
出在人手暮歸在人腰用捨各有時此心兩無邀

耕牛

朝耕草茫茫暮耕水滴滴朝耕及露下暮耕連月出身  
無一毛利主有千箱實睨彼天上星空名豈余匹

水車

取車當要津膏潤及遠野與天常幹旋如雨自漑瀉置  
心亦何有在物偶相假此理乃可言安得圓機者

牧笛

綠草無端倪牛羊在平地芊綿杳靄間落日一橫吹超  
遙送逸響澶漫寫真意豈比賣飴人吹簫販童穉

颺扇

精良止如留疏惡去如擯如擯非爾憎如留豈吾吝無  
心以擇物誰喜亦誰愠翁乎勤簸揚可使糠粃盡

田漏

占星昏晚中寒暑已不疑  
田家更置漏寸晷亦欲知  
汗與水俱滴身隨陰屢移  
誰當哀此勞往往奪其時

牛衣

百獸冬自暖獨牛非  
毳毛無衣與卒歲坐恐得空牢  
主人覆護恩豈啻一綈袍  
問爾何以報離離滿東臯

樓種

富家種論石貧家種論斗  
富貧同一時傾瀉應心手行

看萬壑空坐使千箱有利物博如此何慚在牛後

耒耜

耒耜見於易聖人取風雷不有仁智兼利端誰與開神  
農后稷死般爾相尋耒山林盡百巧揉斲無良材

錢鎛

於易見耒耜於詩聞錢鎛百工聖人為此最功不薄欲  
收禾黍善先去蒿萊惡願同歌器悟更使臣工作

耒耜

鍛金以為曲揉木以為直直曲相後先心手始兩得秦  
人望屋食以此當金革君勿易耰耨鋤勝鋒鏑

襜褕

采采霜露下披披烟雨中蒲茅以為友短褐相與同勿  
妬市門人綺紈被奴僮當慚邊城戍擐甲徂春冬

臺笠

史記索隱謂  
蓬累立也

耕有春雨濡耘有秋陽暴二物應時須九州同我服欲  
為生少慕得此自云足君思周伯陽所願豈華轂

耘鼓

逢逢戲場聲壤壤戰時伍日落未云休田家亦良苦問  
兒今壘上聽此何莽鹵昨日應官繇州前看歌舞

次韻酬微之贈池紙并詩

微之出守秋浦時椎冰看擣萬穀皮波工龜手咤今樣  
魚網肯數荊州池霜紈奪色賈不售虹玉喪氣山無輝  
方船穩載獻天子善價徐取供吾私十年零落尚百一  
持以贈我隨清詩君寧久寄金穀地方執賜筆磨坳螭



當留此物朝上國日侍帝側書新儀不然名山副史本  
褒拔元凱誅窮竒咨予文章非世用畫鏤空爾糜冰脂  
揮毫才足記姓字竊學又恥從師宜忽忽點污亦何忍  
嘉貺但覺難為辭篇終有意責趙璧窮國恐誤連城歸  
傾囊倒篋聊一報安敢坐以秦為雌

酬沖卿月晦夜有感

夜雲不見天況乃星與月蕭蕭暗塵走坎坎寒更發樓  
歌客尚飲酩酊不畏雪巷哭復有人隣風送幽咽紛然

各所遇悲喜孰優劣君方感莊周浩蕩擺羈綆歸來亦  
置酒玉指調絃撥獨我坐無為青燈對明滅

送子思兄參惠州軍

汙汙曲江水天借九秋色樓臺飛半空秀氣盤韶石載  
酒填里閭吹花換朝夕笙簫震河漢錦繡爛冠幘地靈  
瘴癘絕人物傾南極先朝有名臣卧理訟隨息稍稍延  
諸生談笑與賓客子來適妙年謁入交履舄寂寥九齡  
後此獨望一國虞翻禮丁覽韓愈俟趙德孤岸鎮頽波

俗流未易識我方文葆中旋逐旌旗蹟去思今豈忘耳  
目熟遺迹吏舍殷勤言俛仰問乖隔當時府中兒侵尋  
鬢邊白下帷雖著書不抹寒飢迫謂宜門闌士宦路久  
烜赫奈何猶差池更捧丞掾檄驥摧千里蹄鵬墮九霄  
翻人生無巧愚天運有通塞試觀馳騁人意氣宇宙窄  
榮華去路塵謗辱與山積優遊祿仕間較計誰失得送  
君強成歌陟岵翻感激

送董伯懿歸吉州

我來以喪歸君至因謫徙蒼黃憂患中邂逅過於此去  
年服初除聽赦相助喜看君數歸月但屈兩三指茫然  
冬更秋一笑非願始簞輿楊柳下明月芙蓉水僮飢屢  
窺門客罷方隱几是非評衆詩成敗斷前史時時對奕  
石漫浪爭生死送迎皆幅巾設食但陳米亦曾戲篇章  
揮翰疾萬矢君豪才有餘我老憊先止東城景陽陌南  
望長干紫欲劖三畝疏於焉寄殘齒經過許後日唱和  
猶在耳新恩忽捨我欣悵生彼已江湖北風帆捩施即

千里相逢知何時莫惜縑與紙

八月十九日試院夢沖卿

空庭得秋長漫漫寒露入幕愁衣單  
喧喧人語已成市白日未到扶桑間  
永懷所好却成夢玉色髣髴開心顏  
逆知後應不復隔談笑明月相與閒

平甫歸飲

無田士相弔亦以廢燕樂我官雖在朝  
得飲乃不數詩書向牆戶賓至無杯杓  
空取上古言醕之等糟粕有如

揚子雲歲晚天祿閣但無載酒人識字真未博叔兮歸  
自東一笑堂上酌緒餘不及客兒女聊相酢高談非世  
歡自慰亦不惡寄言繁華子此趣由來各

荅陳正叔

天馬志萬里駕鹽不如閒壯士困局束不如弃之完利  
行有阨輟勢涉無恬濶明明千年羞促促一日歡孰肯  
避此世引身取平寬超然子有意為我歌考槃予方慕  
孔氏委吏久盤桓得失未云殊聊各趨所安

過食新城藕

他年過食新城藕  
枕藉船中載親友  
今年却到經行處  
獨坐昏烟對舞柳  
甘酸向口無所適  
牢落盤餐與樽酒  
冰房玉節漫自好  
欲御還休涕垂手  
曾參官學居常近  
陽城離別初不久  
人間此願兩未能  
西風落日空回首

明州錢君倚衆樂亭

使君幕府開東部  
名高海曲人知慕  
艤船談笑政即成  
洗滌山川作佳趣  
平泉浩蕩銀河注  
想見明星弄機杼

載沙築成天上路投虹為橋取孤嶼掃除荆棘水中央  
碧瓦朱甍隨指顧春風滿城金版舫來看置酒新亭上  
百女吹笙彩鳳悲一夫伐鼓靈鼉壯安期羨門相與遊  
方丈蓬萊不更求酒酣忽跨鯨魚去陳迹空令此地留

愛日

鴈生陰沙春冬息陽海溼冥冥取南北豈以食為累咨  
予愁病軀朴鄙人所戲無才治時難量力當自弃豈知  
塞上霜飄然亦何事高堂已白髮愛日負明義悲風吹



平原秣馬聊一榻含懷孰與語仰屋思嘆喟孟母知身  
從萊妻恥人制一肉倘易謀萬鍾非得計

荅裴煜道中見寄

君遊苦數歸苦晚一驛險有千里遠知君陟降旦暮間  
馬力不勁厭長坂雨脚墜地花枝低風頭入溪蒲葉偃  
此處登臨不奈愁瓊樹森森遮疊巘

餘寒

餘寒駕春風入我征衣裳捫鬢祇得凍蔽面尚疑創士

耳恐猶墜馬毛欲吹僵牢持有失箸疾飲無留湯瞳瞳  
扶桑日出有萬里光可憐當時不濕地上霜冥冥鴻  
鴈飛北望去成行誰言有百鳥此鳥知陰陽豈時有必  
至前識聖所臧把酒謝高翰我知思故鄉

孤城

孤城回望

一作首

距幾何記得好處常經過最思東山烟

樹色更憶南湖秋水波百年顛倒

一作三年飄忽

如夢寐萬事

乖隔

一作萬事感激

徒悲歌應湏飲酒不復道今夜江頭明月

多

和微之藥名勸酒

赤車使者錦帳郎從容珂馬留閑坊紫芝眉宇傾一坐  
笑語但聞雞舌香藥名勸酒詩實好陟釐為我書數行  
真珠的皪鳴槽牀金罍琥珀正可嘗史君子細看流光  
莫惜覓醉衣淋浪獨醒至死誠可傷歡華易盡悲酸早  
人間沒藥能醫老寄言歌管衆少年趁取烏頭未白前

客至當飲酒二首

結屋在牆陰閉門讀詩書懷我平生友山水異秦吳杖  
藜出柴荆豈無馬與車窮通適異趣談笑不相愉豈復  
求古人浩蕩與之俱客至當飲酒日月無根株

二

天提兩輪光環我屋角走自從紅顏時照我至白首累  
累地上土往往平生友少年所種樹磳硤行復朽古人  
有真意獨在無好醜冥冥誰與論客至當飲酒

乙未冬婦子病至春未已

天旋無窮走日月青髮能禁幾回首兒呻婦嘆冬復春  
強欲笑歌難發口黃卷幽尋非貴嗜藜牀穩卧雖貧有  
二物長乖亦可憐一生所得猶多苟

強起

寒堂耿不寐轆轤聞車聲不知誰家兒先我霜上行歎  
息夜未央呼燈置前楹推枕欲強起問知星正明昧旦  
聖所勉齊詩有雞鳴嗟予以竊食更覺負平生

飲裴侯家

裴侯飲我日向中  
四坐賓客顏皆紅  
掃除高館邀我入  
自出糴麥憐民窮  
天邊眼力破萬里  
桑麻冥冥山四起  
野心探尋殊未已  
更欲湔衣北城水  
忽見碧樹櫻桃懸  
下馬恣食不論錢  
赤星磊落入我眼  
恐是半醉遊青天  
裴侯方坐塵沙裏  
役身救物當如此  
我曾偶脫簿領間  
何忍愛惜一日閒  
且歸拂席飽眠睡  
明日更看滁南山

送謝師宰赴任楚州二首

珠玉不自貴  
故為人所憐  
賢愚亦如此  
好惡有自然  
聞

子欲東南使我抱幽悵炎風沙土中甘與子留連大梁  
非無客跪起廢食眠相看獨不厭以此知子賢衰氣已  
難強壯心方少年才高豈易得勗子在雕鐫

二

昆崙一支流向東七月八月船如風愛君少壯此行樂  
恨我留連成老翁神頭兩岸水無窮伏檻荷花滿地紅  
當時不得君攜手今日山川在眼中

次韻遊山門寺望文春山

宣城百山間文脊尤奇峰拔出飛鳥上圖畫難為容聞  
昔有幽人捫蘿追赤松遺形此古室孤坐鹿裘重人去  
邈不反洞壑空藏龍側行蒼岵烟俯仰求靈蹤遊者如  
可得甘棄萬戶封安能久塵土傾倒相迎逢

車螯

海於天地間萬物無不容車螯亦其一埋沒沙水中獨  
取常苦易衛生乏明聰機緘誰使然含蓄略相同坐欲  
腸胃得要令湯火攻置之先生盤噉客為一空蠻夏怪



四坐不論殼之功狼籍堆左右棄置任兒童何當強收  
拾持問大鑒工

疥

浮陽燥欲出陰濕與之戰燥濕相留連蟲出乃投間搔  
膚血至肢解衣燎爐炭方其愜心時更自無可患呼醫  
急治之莫惜千金散有樂即有苦愜心非所願

臨川文集卷十一

欽定四庫全書

臨川文集卷十二

宋 王安石 撰

古詩

和平甫舟中望九華山二首

和中甫兄春日有感

信陵坊有籠山樂官

收鹽

省兵

發廩

感事

美玉

寄曾子固

同杜使君飲城南

有感

送孫叔康赴御史府

別馬祕丞

到郡與同官飲

追送朱氏女弟宿木瘤僧舍

招同官遊東園

九日隨家人遊東山遂遊東園

秋懷

既別羊王二君與同官飲城南

試茗泉

躍馬泉

白紵山

七星硯

九鼎

九井

寄題衆樂亭

書會別亭

題舒州山谷寺石牛洞泉穴

和平甫舟中望九華山二首

楚越千萬山雄奇此山魚盤根雖巨壯其末乃脩纖去  
縣尚百里側身勇前瞻蕭條烟嵐上縹緲浮青尖徐行  
稍復逼所矚亦已添精神去疊疊氣象來漸漸却席取  
近岼移船傍蒼蘆窺觀坐窮晡未覺晷刻淹江空萬物  
息四面波瀾恬我然九女鬟爭出一鏡匳卧送秋月沒  
起看朝陽暹遊氛蕩無餘瑣細得盡覘陵空翠纛直照  
影寒鉉銘冢木立紺髮崖林張紫髯變態生倏忽雖神  
詎能占當留老吾身少駐誰云饜惜哉秦漢君黃屋上

衡瀟等之事嬉遊捨此何其庶我疑二后荒神物久已  
厭埋藏在雲霧不欲登昏愴又疑避褒封蔽匿以為謙  
或是古史書脫落簡與籤當時備巡遊今不在緇縑終  
南秦之望泰山魯所詹天王與秩祭俎豆羅醢鹽苟能  
澤下民維此遠亦沾方今東南旱土脉燥不黏尚無膚  
寸功豈免竊食嫌神莽吾難知士病吾能斲文章巧傳  
會智術工飛箝薦寶互圭璧論材自楸栢苟以飾婦妾  
謬云活蒼黔豈如幽人樂茲山謝閭閻穴石作戶牖垂



泉當門簾尋奇出後徑覽勝倚前簷超然往不返舉世  
徒咕咕高興寄日月千秋伴烏蟾遐追商洛翁秦火不  
能炎近慕楚穆生竟脫楚人鉗吾意竊所尚人謀諒難  
僉

二

誰謂九華遠吾身未嘗詹唱篇每起予予口安能箝憶  
在秋浦北空江上新蟾光潔寫一鏡迴環兩堤奩露坐  
引衣襟風行歌帽簷維舟當此時巨細得盡瞻試嘗論

大略次乃述微纖此山廣以深色畜萬物兼嘘雲吐霧  
雨生育靡不漸巍然如九皇德澤四海沾此山相後先  
各出羣峰尖毅然如九官羅列在堂廉挺身百辟上附  
麗無姦愴此山高且寒五月不覺炎草樹萋已綠冰霜  
尚涵淹頽然如九老白髮連蒼髯此山當無雲秀色鬱  
以添婉然如九女靚飾出重簾珮環與巾裙紺玉青紈  
縑遠之妍西施近或醜無鹽變態不可窮詩者徒咕咕  
我初勇一往後世難安恬浪荒不走職民瘼當誰砭乖

離今數旬夢想欲窺覘自期得所如何啻釋囚鉗念昔  
太白巔下視海日暹竭來天柱遊屐齒尚苔黏猶之健  
飲食屢饗亦云饜胡為慕攀踏已憊且不嫌豈其仁智  
心山水固所潛男兒有所學進退不在占功名苟不諧  
廊廟等閭閻况乃掄椽杙其誰辨梗枲歸歟巖崖居料  
理帶與籤得石坐兀兀逢泉飲厭厭取舍斷在獨豈必  
詢謀僉子語實慰我寧殊邑中黔玉枝將在山當倚以  
葭蕕詩力我已屈鋒鏑子猶銛扶復更一戰語汝其無

謙

和中甫兄春日有感

雪釋沙輕馬蹄疾北城可遊今暇日  
濺濺溪谷水亂流  
漠漠郊原草爭出嬌梅過雨吹爛熳  
幽鳥迎陽語啾唧  
分香欲滿錦樹園剪綠休開寶刀室  
胡為我輩坐自苦  
不念茲時去如失飽聞高選動車輪  
甘卧空堂守經帙  
淮蝗蔽天農父餓越卒圍城盜少逸  
至尊深拱罷簫韶  
元老相看進刀筆春風生物尚有意  
壯士憂民豈無術

不成歡醉但悲歌回首功名古難必

信陵坊有龍山樂官

萬里山林姿羽毛何璀璨鳴聲應律呂唯有知者愛都  
門市井兒誰翫汝文承應須鎖樊籠勿受丸矰害

收鹽

州家飛符來比櫛海中收鹽今復密窮囚破屋正嗟歎  
吏兵操舟去復出海中諸島古不毛島夷為生今獨勞  
不煎海水餓死耳誰肯坐守無亡逃爾來賊盜往往有

劫殺賈客沉其艘一民之生重天下君子忍與爭秋毫

省兵

有客語省兵省兵非所先方今將不擇獨以兵乘邊前  
攻已破散後距方完堅以衆亢彼寡雖危猶幸全將既  
非其才議又不得專兵少敗孰繼胡來飲秦川萬一雖  
不爾省兵當何緣驕惰習已久去歸豈能田不田亦不  
桑衣食猶兵然省兵豈無時施置有後前王功所由起  
古有七月篇百官勤儉慈勞者已息肩游民慕草野歲

熟不在天擇將付以職省兵果有年

發廩

先王有經制頒賚上所行後世不復古貧窮主兼并非  
民獨如此為國賴以成築臺尊寡婦入粟至公卿我嘗  
不忍此願見井地平大意苦未就小官苟營營三年佐  
荒州市有棄餓嬰駕言發富藏云以救鰥惻崎嶇山谷  
間百室無一盈鄉豪已云然罷弱安可生茲地昔豐實  
土沃人良耕他州或些窳貧富不難評幽詩出周公根

本詎宜輕願書七月篇一寤上聰明

感事

賤子昔在野心哀此黔首豐年不飽食水旱尚何有雖  
無剽盜起萬一且不久特愁吏之為十室災八九原田  
敗粟麥欲訴嗟無賕間關幸見省答扑隨其後況是交  
冬春老弱就僵仆州家閉倉庾縣吏鞭租負鄉鄰銖兩  
徵坐逮空南畝取貲官一毫姦桀已云富彼昏方怡然  
自謂民父母竭來佐荒郡懔懔常慚疚昔之心所哀今



也執其咎乘田聖所勉况乃余之陋內訟敢不勤同憂  
在僚友

美玉

美玉小瑕疵國工猶珍之大賢小玷缺良交豈其絕小  
缺可以補小瑕可以磨不補亦不磨人為奈爾何

寄曾子固

吾少莫與合愛我君為最君名高山嶽嶠孽嵩與泰低  
心收憇友似不讓塵垢又如滄江水不逆溝畎澮君身

揭日月遇輒破氛靄我材特窮空無用補倉廩謂宜從  
君久垢污得淘汰人生不可必所願每顛沛乖離五年  
餘牢落千里外投身落俗甯薄宦自鉗鉉平居每自守  
高論從誰丐搖搖西南心夢想與君會思君挾竒璞願  
售無良僧窮閭抱幽憂凶禍費襁褓州窮吉士少誰可  
壻諸妹仍聞病連月醫藥誰可賴家貧奉養狹誰與通  
貨貝詩人刺曹公賢者荷戈役奈何遭平時德澤盛汪  
濊鸞鳳鳴且下萬羽來翾翾呦呦林間鹿爭出噬苹藿

乃令高世士動輒遭狼狽人事既難了天理尤茫昧聖  
賢多如此自古云無奈周人貴婦女扁鵲名醫滯今世  
無常勢趨舍唯利害而君信斯道不閔身窮泰弃捐人  
間樂濯耳受天籟諒知安肥甘未肯顧糠粃龍螭雖蟠  
屈不慕虵蟬蛻令人重感奮意勇忘身最何由日親炙  
病體同砭艾功名未云合歲月尤湏愒懷思切劇効中  
夜淚霽霽君嘗許過我早晚治車軌山溪雖峻惡高眺  
簇蒙肺峰巒碧參差木樹青暎藹桐江路尤駛飛槩下

鳴瀨魚村指暮火酒舍瞻晨旆清醪足消憂玉鯽行可  
膾行行願無留日夕佇傾蓋會將見顏色不復謀著蔡  
延陵古君子議樂恥言鄩細事豈足論故欲論其大披  
披發韃橐懷懷見戈鉞探深犯嚴壁破惑翻強旌離行  
步荃蘭偶坐陰松檜宵牀連衾幬晝食共麤糲茲歡何  
時合清瘦見衣帶作詩寄微誠誠語無綵繪

同杜使君飲城南

山公遊何處白馬鳴翩翩檀那十畝碧五月浮寒烟留

客聽其間風吹江海縣出罇不見日竹外空青天焚蠟  
助月出酒光發金船狂客惜不去醉翁舞回旋何必吹  
簫人玉枝自嬋娟歸路借紅燭雨星低馬前

有感

憶昔與胡子戲娛西城幽放斥僕與馬獨身步田疇牛  
豎歌我旁聽之為久留一接田父語嘆之勝王侯追逐  
恨不恣暮歸輒懷愁顧常輕千乘祗願足一丘子時怪  
我少好此寂寞遊笙簧不入耳又不甘醪羞那知抱孤

傷罷頓不能遁世味已鮮少但餘野心稠乖離今十年  
斑髮滿我頭昔興亦畧盡食眠常百憂每逢佳山水欲  
往輒復休方壯遂如此况乃高春秋

送孫叔康赴御史府

古人喜經綸萬事慚強聒時來上青冥俯仰但一節危  
言回邱山聲利盡毫末由來治亂體宿昔心已達肯隨  
俗好惡議論輕自決遺風何寥寥夢寐待豪傑天書下  
東南趣召赴嚴闕長材晦朝倫高行隱家閭新除疇問

望宿蘊行施設念吾非忘形此理未易說

別馬祕丞

伯夷惡一世季也皆鄉人吾嘗論夫子有似季之倫人  
情路萬殊近世頗荆榛唯君遊其間坦坦得所循意君  
誠愷悌慕向從宿昔奈何初相懽鷁首已云北萋萋郊  
原青漠漠風雨黑冠蓋滿津亭君今去何適

到郡與同官飲

時倅  
舒州

瀉碧沄沄橫帶郭浮蒼靄靄遙連閣草木猶疑夏鬱蔥

風雲已見秋蕭索  
荒歌野舞同醉醒  
水果山肴互酬酢  
自嫌多病少懽顏  
獨負嘉賓此時樂

自舒州追送朱氏女弟憇獨山館宿木瘤僧  
舍明日度長安嶺至皖口

晨霜踐河梁  
落日憇亭臯  
念彼千里行  
惻惻我心勞  
攬轡上層岡  
下臨百仞濠  
寒流咽欲絕  
魚鼈久已逃  
暮行苦遄迴  
細路隱蓬蒿  
驚麕出馬前  
烏駭亡其曹  
投僧避夜雨  
古檠昏無膏  
山木鳴四壁  
矧身在波濤  
平明長安



嶺飛雪忽滿袍天低浮雲深更覺所向高

招同官遊東園

青青石上蘂霜至亦已凋冉冉水中蒲爾生信無聊感  
此歲云晚欲懽念誰邀嘉我二三子為回東城鑣幽菊  
尚可泛取魚繫榆條毋為百年憂一日以逍遙

九日隨家人遊東山遂遊東園

暑往詎幾時涼歸亦云暫相隨東山樂及此身無憾聊  
回清池施更伏荒城檻采采黃金花持盃為君泛

秋懷

城南平野寒多露  
窻僻舍風秋氣度  
鄰桑槭槭已欲空  
悲蟲啾啾促機杼  
柴門半掩掃烏迹  
獨抱殘編與神遇  
韓公既去豈能追  
孟子有來還不拒

既別羊王二君與同官會飲於城南因成寄

用藥名

赤車使者白頭翁  
當歸入見天門冬  
與山久別悲忽忽  
澤瀉半天河漢空  
羊王不留行薄晚  
酒肉從容追路遠

臨流黃昏席未卷玉壺倒盡黃金盞羅列當辭更繾綣  
預知子不空青眼嚴徐長卿誤推挽老年揮翰天子苑  
送車陸續隨子返坐聽城雞腸宛轉

試茗泉

此泉地何偏陸羽曾未閱坻沙光散射竇乳甘潛洩靈  
山不可見嘉草何由啜但有夢中人相隨掬明月

躍馬泉

古水縮蛟螭憎山欲隳突山祇來伐之半嶺跳齧膝玉

珂鳴塞空組練光照日崩騰赴不測一陷常萬匹神戰  
異人間千秋為儵忽泉旁往來客夜寄幽人室但聽鳴  
蕭蕭何由見神物

白紵山

白紵衆山頂江湖所縈帶浮雲卷晴明可見九州外肩  
輿上寒空置酒故人會峰巒帳錦繡草木吹竽籟登臨  
信地險俯仰知天大留歡薄日晚起視飛鳥背殘年苦  
局束往事嗟摧壞歌舞不可求桓公井空在

七星硯

余聞星墮地往往化為石石上有七星此理余莫測持  
來當白日光彩不可匿恍如起鴻蒙俯仰帝垣側當由  
偶然似見取參筆墨豪心蕩珍異樂以萬金得南工始  
為偽傳合巧無隙亦時疑世人故自有能識

九鼎

禹行掘山走百谷蛟龍竄藏魑魅伏心誌幽妖尚覬隙  
以金鑄鼎空九牧冶雲赤天漲為黑韞風餘吹山拔木

鼎成聚觀變怪索夜人行歌鬼晝哭功施元元後無極  
三姓衛守相傳屬弱周無人有宜出沉之九幽拆地軸  
始皇區區求不得坐令神姦窺邑屋

九井

得盈字

汾崖涉澗三十里高下聲確無人耕捫蘿挽葛到山趾  
仰見吹瀉何崢嶸餘聲投林欲風雨末勢卷土猶溪阮  
飛蟲淩兢走獸慄霜雪夏落雷冬鳴野人往往見神物  
鱗甲漠漠雲隨行我来立久無所得空數石上菖蒲生

中官繫龍沉玉冊小吏磔狗澆銀觥地形偶爾藏險怪  
天意未必司陰晴山川在理有崩竭丘壑自古相虛盈  
誰能保此千世後天柱不折泉常傾

寄題衆樂亭

陵陽遊觀吾所好恨不即過衆樂亭嘗聞髣髴入夢寐  
吟筆自欲圖丹青千峰秀出百里外忽於其上崢嶸楹  
朝雲噓壘日暖暖夜水落澗風泠泠春花窈窕鳥爭舞  
夏木蔭鬱猿哀鳴潦收葉落天地爽海月影到山川明

籃輿晨出誰與適坐與萬物觀虛盈令思民事不忍後  
田間笑語催蠶耕吏休歸舍獄訟少墟落飲酒欲秋成  
唯愁一日奪令去出來老稚交逢迎彼民安知方祿仕  
徒喜使我寬逋征令知道義士林服遺愛豈用吾詩評

書會別亭

西城路居人送客西歸處年年借問去何時今日扁舟  
從此去春風吹花落高枝飛去飛來不自知路上行人  
亦如此應有重來此處時



題舒州山谷寺石牛洞泉穴

皇祐三年九月十六日自州之

太湖過懷寧縣山谷乾元寺宿興道人文銳弟安國擁火遊石牛洞見李翱習之書聽泉

久之明日復遊乃刻習之後

水泠泠而北出山靡靡而旁圍欲窮源而不得竟悵望以空歸

臨川文集卷十二

欽定四庫全書

臨川文集卷十三

宋 王安石 撰

古詩

泊舟姑蘇

崑山慧聚寺次孟郊韻

如歸亭順風

垂虹亭

張氏靜居院

丙戌五日京師作二首

答客

次韻唐彥猷華亭十詠

顧林亭

寒穴

吳王獵場

始皇馳道

柘湖

陸瑁養魚池

華亭谷

陸機宅

崑山

三女崗

太白嶺

禿山

贈曾子固

鮑公水

寄李士寧先生

僧德殊水簾

杭州修廣師法喜堂

復至曹娥堰寄丁元珍

荅曾子固南豐道中所寄

寄贈胡先生

得曾子固書因寄

寄虔州江陰二妹

登越州城樓

憶昨詩示諸外弟

泊舟姑蘇

朝遊盤門東暮出閶門西  
四顧茫無人但見白日低  
荒林帶昏烟上有歸鳥啼  
物皆得所託而我無安棲

崑山慧聚寺次孟郊韻

僧蹊蟠青蒼莓苔上秋牀  
露翰飢更清風藹遠亦香掃

石出古色洗松納空光久遊不忍還迫迫冠蓋場

如歸亭順風

春江窈窕來無地飛帆浩浩窮天際朝出吳川夕雲溪  
回首喬林吹岸薺柁師高卧自嘯歌戲彼挽舟行復止  
人生萬事反衍多道路後先能幾何

垂虹亭

三江五湖口地與天不隔日月所蔽虧東西渺然白漫  
漫漫北斗浩浩浮南極誰投此虹蜺欲濟兩間阨中流



雜蜚氣欄楯相承翼初疑神所為滅沒在頃刻晨興坐  
其上傲兀至中吳猶憐變化功不謂因人後今君持酒  
漿談笑顧賓客頗誇九州物壯麗此無敵熒煌丹沙柱  
璀璨黃金壁中家不慮始助我皆豪殖喟予獨感此剝  
爛有終極改作不可無還當采民力

張氏靜居院

動者利進為靜者樂止居物性有偏得惟賢時卷舒張  
侯始出仕所至多名譽老矣歸偃休買地闢荒蕪屋成

為令名名實與時俱南堂棲幽真晨起瞻像圖北堂畫  
五禽游戲養形軀燕有諸賓庭學有諸子廬問侯年幾  
何矯矯八十餘問侯何能爾心不藏憂愉問侯客何為  
弦歌飲投壺問侯兒何讀夏商及唐虞嵩山填門戶洛  
水繞階除疾於山水間結駟有通衢我念老退者古多  
賢大夫留侯亦養生乃欲凌空虛閉門不飲酒豈異山  
中臞疏傳稍喜客揮金能自娛不聞喜教子滿屋青紫  
朱張侯能兼取勝事古所無褒稱有樂石丞相為之書

而我不自量聞風亦歌呼

丙戌五日京師作二首

北風閣雨去不下驚沙蒼茫亂昏曉傳聞城外八九里  
電大如拳死飛鳥

二

浮雲離披久不合太陽獨行乾萬物誰令昨夜雨霏霰  
北風蕭蕭寒到骨

答客

士常疑西伯何至姜里辱瞽鯀親父子尚脫井廩酷昏  
主雖聖臣飛禍安可卜致命遂其志雖窮不為戮

次韻唐彥猷華亭十詠

顧林亭

野王所居也

寥寥湖上亭不見野王居平林豈舊物歲晚空扶疎自  
古聖賢人邑國皆丘墟不朽在名德千秋想其餘

寒穴

神農列冰霜高穴與雲平空山渟千秋不出鳴咽聲山

風吹更寒山月相與清北客不到此如何洗煩醒

吳王獵場

吳王好射虎但射不操戈匹馬掠廣場萬兵助遮羅時  
平事非昔此地桑麻多猛獸亦已盡牛羊在田坡

始皇馳道

穆王得八駿萬事得期修茫茫萬載間復此好遠遊車  
輪與馬跡此地亦嘗留想當治道時勞者尸如丘

柘湖

湖中有山生柘故名柘湖記  
云秦有女入湖為神今有廟

柘林著湖山菱葉蔓湖濱秦女亦何事能為此湖神年  
年賽雞豚漁子自知津幽妖窟險阻禍福易欺人

陸瑁養魚池

野人非昔人亦復水上居紛紛水中遊豈是昔時魚吹  
波浮還沒競食糟糠餘吞舟不可見守此歲月除

華亭谷

水行三百  
里入松江

巨川非一源源亦在衆流此谷乃清淺松江能覆舟蟲  
魚何所知上下相沉浮徒嗟大盈北浩浩無春愁

華亭  
水自

大盈入松江  
而北入海

陸機宅

故物一已盡嗟此歲年深野桃自著花荒棘自生鍼  
芊芊谷水陽鬱鬱崑山陰俛仰但如昨遊者不可尋

崑山

世傳陸氏家生機雲  
故名崑山言生玉也

玉人生此山山亦傳此名崖風與穴水清越有餘聲悲  
哉世所珍一出受歌傾不如鶴與猿棲息尚全生

三女崗

吳王葬三  
女於此

自古世上雄慷慨擅功名當時豈有力能使死者生三  
女共一丘此憾亦難平音容若有作無力傾人城

太白嶺

太白龍從東南馳衆嶺環合青紛披烟雲厚薄皆可愛  
樹石疎密自相宜陽春已歸鳥語樂溪水不動魚行遲  
生民何由得處所與茲魚鳥相諧熙

禿山

吏後滄海上瞻山一停舟恠此禿誰使鄉人語其由一



狙山上鳴一狙從之遊相匹乃生子子衆孫還稠山中  
草木盛根實始易求攀挽上極高屈指亦窮幽衆狙各  
豐肥山乃盡侵牟攘爭取一飽豈暇議藏收大狙尚自  
苦小狙亦已愁稍稍受咋嚙一毛不得留狙雖巧過人  
不善操耒耨所嗜在果穀得之常似偷嗟此海山中四  
顧無所投生生未云已歲晚將安謀

贈曾子固

曾子文章衆無有水之江漢星之斗挾才乘氣不媚柔

羣兒謗傷均一口吾語羣兒勿謗傷豈有曾子終皇皇  
借令不幸賤且死後日猶為班與揚

鮑公水

村南鮑公山山北鮑公水高穴逗遠源泠泠落山嘴玉  
色與飴味不可他味比竹樹四蒙密翠藤相披靡漫郎  
昔少年幽居得之此臨窺若有遇愛歎無時已浮名未  
汙染永矢終焉爾奈何中棄入長安十載風塵化舊顏  
謹囑滿耳不可洗此水泠泠空在山

寄李士寧先生

樓臺高聳間晴霞松檜陰森夾柳斜渴愁如箭去年華  
陶情滿滿傾榴花自嗟不及門前水流到先生雲外家  
僧德殊家水簾求予詠

淙淙萬音落石顛皎皎一派當簷前清風高吹鸞鶴唳  
白日下照蛟龍涎浮雲粧額自能卷缺月琢鉤相與縣  
朱門試問幽人價翡翠鮫綃不直錢

杭州修廣師法喜堂

浮屠之法與世殊洗滌萬事求空虛師心以此不挂物  
一堂收身自有餘堂陰置石雙崹崹石脚立竹青扶疎  
一來已覺肝膽豁况乃宴坐窮朝晡憶初救時勇自許  
壯大看俗尤崎嶇豐車肥馬載豪傑少得志願多憂虞  
始知進退各有理造次未可分賢愚會將築室返耕釣  
相與此處吟山湖

復至曹娥堰寄剡縣丁元珍

溪水渾渾來自北千山抱水清相射山深水急無艇子

欲從故人安可得故人昔日此水上罇酒扁舟慰行役  
津亭把手坐一笑我喜滿懷君動色論新講舊惜未足  
落日低徊已催客離心自醉不復飲秋果寒花空滿席  
今年却坐相逢處悵難求別時迹可憐溪水自南流  
安得溪船問消息

答曾子固南豐道中所寄

吾子命世豪術學窮無間直意慕聖人不問閔與顏彼  
昏何為者誣構來嘖嘖應逮犯秋陽動為人所歎不恤

我躬瘁乃嗟天澤慳令人念公卿煜煜趨王班泊無憫  
世意狙猿而佩環愛子所守卓憂予不能攀永矢從子  
游合如扉上鑠願言借餘力迎浦疎潺潺亦有衣上塵  
可攀裨太山大江秋正清島淑相縈轡四盼浩無主日  
暮烟霞斑水竹密以勁霜楓衰更殷賞託亦云健行矣  
非間關相期東北遊致館淮之灣無為襲寧羸悠然及  
溫遠

寄贈胡先生 并序

孔孟去世遠矣信其聖且賢者質諸書焉耳翼之先生與予並世非若孔孟之遠也聞薦紳先生所稱述又詳於書不待見而後知其人也歎慕之不足故作是詩

先生天下豪傑魁胸臆廣博天所開文章事業望孔孟不復睥睨蔡與崔十年留滯東南州飽足藜藿安蒿萊獨鳴道德驚此民民之聞者源源來高冠大帶滿門下奮如百蟄乘春雷惡人沮服善者起昔時蹻跼今騫回先生不試乃能爾誠令得志如何哉吾願聖帝營太平

補葺廊廟枝傾頽披旒發續廣耳目照徹山谷多遺材  
先收先生作梁柱以次構架桷與椽羣臣面向帝深拱  
仰戴堂陛方崔嵬

得曾子固書因寄

始吾居揚日重問每見及云將自親側萬里同講習子  
行何舒舒吾望已汲汲窮年夢東南顏色不可挹仁賢  
豈欺我正恐事維繫嚴親抱憂衰生理賴以給不然航  
江外天寒北風急無乃山路惡僕弱馬行澁孤懷未肯



開歲物忽如蟄，竭來高郵住。巷屋頗卑濕，蓬蒿稍芟除。  
茅竹隨補葺，苟云禦風氣。尚恐憂雨汁，故人莫在眼。  
屢獨開巾笈，忠信蓋未見。吾敢誣茲邑，出關誰與語。  
念子百憂集，眺聽聊自放。日暮城頭立，徐歸坐當戶。  
使者操書入，時開識子意。如渴得美濟，驪駒日就道。  
玉手行可執舊學，待鐫磨新文。得刪拾重登城頭，望喜氣滿原隰。

寄虔州江陰二妹

貢水日夜下，下與章水期。我行二水間，無日不爾思。飄

若越鳥北心常在南枝又如岐首蛇南北兩欲馳逝者  
日已遠百憂詎能追生存苦乖隔邂逅亦何時女子歸  
有道善懷見於詩庶云留汝車慰我堂上慈

登越州城樓

越山長青水長白越人長家山水國可憐客子無定宅  
一夢三年今復北浮雲縹緲挹城樓東望不見空回頭  
人間未有歸耕處早晚重來此地遊

憶昨詩示諸外弟

憶昨此地相逢時春入窮谷多芳菲短垣困冠翠嶺  
躑躅萬樹紅相圍幽花媚草錯雜出黃蜂白蝶參差飛  
此時少壯自負恃意氣與日爭光輝乘閒弄筆戲春色  
脫略不省旁人譏坐欲持此博軒冕肯言孔孟猶寒飢  
丙子從親走京國浮塵空並緇人衣明年親作建昌吏  
四月挽船江上磯端居感慨忽自寤青天閃爍無停暉  
男兒少壯不樹立挾此窮老將安歸吟哦圖書謝慶弔  
坐室寂寞生伊威材疎命賤不自揣欲與稷契遐相希

旻天一朝畀以禍先子泯沒予誰依精神不離肝肺絕  
皆血被面無時晞母兄呱呱泣相守三載厭食鍾山薇  
屬聞降詔起羣彥遂自下國趨王畿刻章琢句獻天子  
釣取薄祿歡庭闈身着青衫手持版奔走卒歲官淮沂  
淮沂無山四封瘁獨有廟塔尤我巍時時憑高一悵望  
想見江南多翠微歸心動蕩不可抑霍若猛吹飜旌旂  
騰書漕府私自列仁者惻隱從其祈暮春三月亂江水  
勁櫓健帆如轉機還家上堂拜祖母奉手出涕縱橫揮

出門信馬向何許城郭宛然相識稀永懷前事不自適  
却指舅館接山扉當時髻兒戲我側于今冠佩何頗頗  
况復丘樊滿秋色蜂蝶摧藏花草腓令人感嗟千萬緒  
不忍蒼卒回驂駢留當開樽強自慰邀子劇飲毋予違

臨川文集卷十三

欽定四庫全書

臨川文集卷十四

宋 王安石 撰

律詩 五言八句

欣會亭

東臯

歲晚

半山春晚即事

敲眠

露坐

山行

題雲祠堂

在寶公塔院

定林

送張甥赴青州幕

送張宣義之官越幕二首

送贊善張軒民西歸

送鄧監簿南歸



秋夜二首

即事

晝寢

過故居

鴈

與道原過西莊遂遊寶乘二首

送陶氏婦兼寄純甫

自府中歸寄西庵行詳

贈上元宰梁之儀承議

贈殊勝院簡道人

懷吳顯道

淨照堂

重遊草堂次韻三首

題齊安寺山亭

自白門歸望定林有寄

宿定林示無外

名務周

宿北山示行詳上人

獨飯

草堂

示耿天隲

光宅

示無外

北山暮歸示道人

懷古二首

與寶覺宿精舍

中書偶成

華藏寺會故人

得泉字

求全

秋風

次韻昌叔歲暮

次韻酬昌叔羈旅之作

欣會亭

數家鄰水竹一塢共雲林晚食靜適已獨謠欣會心移  
牀隨漫興操筴取幽尋未愛神雖汝猶憐妙斲琴

東臯

起伏晴雲徑縱橫暖水陂草長流翠碧花遠沒黃鸝楚  
製從人笑吳吟得自怡東臯興不淺遊走及芳時

歲晚

月映林塘澹風含笑語涼俯窺憐綠淨小立佇幽香攜  
幼尋新的扶衰坐野航延緣久未已歲晚惜流光

半山春晚即事

春風取花去，酬我以清陰。  
翳翳陂路靜，交交園屋深。  
牀敷每小息，杖屨或幽尋。  
惟有北山鳥，經過遺好音。

歌眠

翠幙卷東岡，歌眠月半牀。  
松聲悲永夜，荷氣馥初涼。  
清話非無寄，幽期故不忘。  
扁舟亦在眼，終自懶衣裳。

露坐

露坐看溝月，飄然風度荷。  
珠跳散作點，金湧合成波。  
老

失芳歲易靜知良夜多陵秋久不寐吾樂豈弦歌

山行

出徧清淺景歸穿蒼翠陰平頭均楚製長耳嗣吳吟暮  
嶺已佳色寒泉仍好音誰同此真意倦鳥亦幽尋

題雲祠堂

在寶公塔院

斯文實有寄天豈偶生才一日鳳鳥去千秋梁木摧烟  
留衰草恨風造暮林哀豈謂登臨處飄然獨往來

定林

漱甘涼病齒坐曠息煩襟因脫水邊屨就敷巖上衾但  
留雲對宿仍值月相尋真樂非無寄悲蟲亦好音

送張甥赴青州幕

人情每期費之子適予心老餞城東陌悲分歲暮襟少  
留班露草遂往隔雲林未覺青丘遠因風嗣好音

送張宣義之官越幕二首

會稽遊宦鄉海物錯句章土潤箭萌美水甘茶串香今  
君誠暫屈他日恐難忘唯有西興渡靈胥或怒張



二

誰謂貴公子乃如寒士家真宜舉敦樸已自勝浮華洲  
荻藏迷子溪篁擁若耶相望只在眼音問莫言賒

送贊善張軒民西歸

柴荆雀有羅公子數經過邂逅相知晚從容所得多百  
憂生暮齒一笑隔滄波早晚西州路遙聽下坂珂

送鄧監簿南歸

不見驪塘路茫然四十春長為異鄉客每憶故時人水

關公三世雲浮我一身濠梁送歸處握手但悲辛

秋夜二首

客卧書顛倒蟲鳴坐寂寥殘燈生暗暈重露集寒條真  
樂閒尤見深禪靜更超此懷無與晤擁鼻一長謠

二

慢逗長風細窓留半月斜浮烟暝綠草泣露冷黃花獨  
曳緣雲策仍尋度水槎歸時參夜半鄰犬靜中譁

即事

徑暖草如積山晴花更繁縱橫一川水高下數家村靜  
憩雞鳴午荒尋犬吠昏歸來向人說疑是武陵源

晝寢

甲子四月十七日午時作

井邇從蕪漫青藜亦倦扶百年唯有且萬事摠無如弃  
置蕉中鹿驅除屋上烏獨眠窓日午往往夢華胥

過故居

泝棧開新屋扶輿遶故園事遺心獨寄路翳目空存野  
果寒林寂蠻花午簟溫難忘舊時處欲宿愧桑門

鴈

北去還為客南來豈是歸  
倦投空渚泊飢帖冷雲飛  
垣柵雞常暖溝池鷺自肥  
憐渠不知此更墮野人機

與道原過西莊遂遊寶乘

元豐四年十月二十四日

桑楊

一作麻

已零落藻荇亦

一作復

消沉園宅在人境歲時

傷我心强穿西

一作南

埭路共望北山岑欲覓

一作興

道人

語跨鞍聊一尋

二

親朋會合少時序感傷多勝踐聊為樂清談可當歌微  
風淡水竹淨日暖烟蘿興極猶難盡當如薄暮何

送陶氏婦兼寄純甫

雲結川原暗風連草木萎遙瞻李行役正對女傷悲夢  
事中千變生涯老百罹更慚無道力臨路涕交頤

自府中歸寄西庵行詳

意衰難自力扶路便思還強逐蕭騷水遙看慘淡山行  
尋香草徧歸漾晚雲間西崦分明見幽人不可攀

贈上元宰梁之儀承議

梁多留詩在江寧僧舍

白下有賢宰能歌如紫芝  
民欺自不忍縣治本無為  
風月誰同賞江山我亦思  
粉牆侵醉墨怡悵綠苔滋

贈殊勝院簡道人

早悟耆山藹今為洛社豪  
有生常寂寞所得是風騷  
露夕吟逾苦雲收思共高  
此懷差自適千社一牛毛

懷吳顯道

南郭紅亭冷西山白道曛  
江光凌翠氣洲色亂黃雲  
歲

暮誰邀客情親故憶君天涯獨惆悵歸鳥黑紛紛

靜照堂

任公蹲會稽海上得招提淨觀堂新構幽尋客屢攜飛  
簷出風雨灑翰落虹蜺投老黃塵陌東看路恐迷

重遊草堂次韻三首

垣屋荒蕝藟野殿冷檀沈竊有思顯意鷹無戀遁心禪  
房閉深竹齋鉢度遙岑寂寞黃塵裏金身倚一尋

二

僧殘尚食少佛古但泥多寒守三衣法飢傳一鉢歌寬  
閒每迸竹危朽漫牽蘿惆悵庭前栢西來意若何

三

野寺真蘭若山僧老病多疎鐘挾谷響悲梵入樵歌水  
映茅簷竹雲埋薦女蘿拂塵書所見因得擬陰何

題齊安寺山亭

此山無躑躅故國有楊梅悵望心常折慙慙手自栽暮  
年逢火改晴日對花開萬里烏塘路春風自往來



自白門歸望定林有寄

塞驢愁石路余亦倦躋攀不見道人久忽然芳歲殘朝  
隨雲暫出暮與鳥爭還杳杳青松壑知公在兩間

宿定林示無外

名務周

天女穿林至姮娥度隴來欲歸今晚晚相值且徘徊誰  
謂我忘老如聞蟲造哀鄰衾亦不寐共盡白雲杯

宿北山示行詳上人

都城羈旅日獨許上人賢誰為孤峰下還來宴坐邊是

身猶夢幻何物可攀緣  
坐對青燈落松風咽夜泉

獨飯

窓明兩不借榻淨一簾  
蔭桐桐幽人夢天天老者居安  
能問香積誰可告華胥  
獨飯牆陰轉看雲坐久如

草堂

草堂今寂寞往事翳山椒  
蕙帳空留鶴蘿衣終換貂  
生皆墮天秩隱或寄公朝  
疊穎何勞怒東風汝自搖

示耿天隲

挾策能傷性捐書可盡年  
弦歌無舊習香火有新緣  
白土長岡路朱湖小洞天  
望公時顧我於此暢幽悁

光宅

今知光宅寺牛首正當門  
臺殿金碧毀邱墟桑竹繁  
蕭蕭新犢卧冉冉暮鷗翻  
回首千歲夢雨花何足言

示無外

支頤橫口語椎髻曲肱眠  
莫問誰賓主安知汝輩年  
鄰雞生午寂幽草弄秋妍  
卻憶東窓簟蠻藤故宛然

北山暮歸示道人

千山復萬山行路有無間  
花發蜂遞繞果垂猿對攀  
獨尋寒水度欲趁夕陽還  
天黑月未上兒童初掩關

懷古二首

日密畏前境淵明欣故園  
那知飯不賜所喜菊猶存  
亦有牀座好但無車馬喧  
誰為吾侍者稚子候柴門

二

長者一牀室先生三徑園  
非無飯滿鉢亦有酒盈樽  
不

起華邊坐常開柳際門漫知談實相欲辨已忘言

與寶覺宿精舍

擾擾復翩翩秋牀燭屢昏真為說萬物豈止挾三言問  
義曹溪室捐書闕里門若知同二妄目擊道逾存

中書偶成

忽忽余年往茫茫不自知慙慙照清淺邂逅見衰遲輔  
世無賢業容身有聖時歸歟今可矣何以長人為

華藏寺會故人

得泉字

百憂成阻濶一笑得留連城郭西風裏園林落照前共  
知官似夢莫負酒如泉興罷重攜手江湖即渺然

求全

求全傷德義欲速累功名玉要藏而待苗非握故生未  
妨徐出畫何苦急墮成此道今亡矣嗟誰可與明

秋風


擘歛一何饕天機亦自勞牆隈小翻動屋角盛呼號漠  
漠驚沙密紛紛斷柳高江湖豈在眼昨夜夢波濤

次韻昌叔歲暮

城雲漏日晚樹凍裏春深  
慘密魚雖暖巢危鶴更陰  
橫風高曠弩殘溜細鳴琴  
歲換兒童喜還傷老大心

次韻酬昌叔羈旅之作

君方困旅食予亦誤朝簪  
自索東方米誰多季子金  
高門萬馬散窮巷一燈深  
客主竟何事蕭條梁父吟



臨川文集卷十四



欽定四庫全書

集部

臨川文集卷十八

詳校官庶吉士臣龍廷槐

檢討臣何思鈞覆勘

覆校官中書臣呂雲棟

校對官主簿臣汪日贊

謄錄舉人臣曹夢齡

謄錄舉人臣曹錫齡

欽定四庫全書

臨川文集卷十五

宋 王安石 撰

律詩 五言八句

次韻唐公三首

烏塘

欲歸

發館陶

王村

長垣北

冬日

壬辰寒食

雨中

宿雨

乘日

秋露

還自河北應客

將次洺州憩漳上

和仲庶夜過新開湖憶沖之仲涂共泛

送契丹使還次韻荅淨因老

送吳叔開南征

遊棲霞庵約平甫至因寄

和棲霞寂照庵僧雲渺

宜春苑

春日

癸卯追感正月十五事

晚興和沖卿學士

秋興和沖卿

次韻沖卿除日立春

題友人郊居水軒

遊賞心亭寄虔州女弟

江亭晚眺

金山寺

捐仙閣

舟夜即事

何處難忘酒二首

送孫子高

送董傳

寄深州晁同年

白雲然師

自白土村入北寺二首

題朱郎中白都莊

史教授獨善堂

寄福公道人

身間

還家

題湯泉壁示諸子有欲間之意

和唐公舍人訪淨因

沂溪懷正之

答許秀才

次韻唐公三首

東陽道中

山蔽吳天密江蟠楚地深  
浮雲堆白玉落日寫黃金  
渺渺隨行旅紛紛換歲陰  
強將詩詠物收拾濟時心

江行

材非當世用轂有故人推  
使節春冬換征帆日夜開  
南遊取於越東望得州來  
試盡風波惡生涯亦可哀



旅思

此身南北老愁見問征途地大蟠三楚天低入五湖看  
雲心共遠步月影同孤慷慨秋風起悲歌不為鱸

烏塘

地僻居人少山稠伏獸多怒狸朝搏鴈嚙虎夜窺騾  
籬落生孫竹門庭上女蘿未應悲寂寞六載一經過

欲歸

水漾青天暖沙吹白日陰塞垣春錯莫行路老侵尋綠

稍還幽草紅應動故林留連一盃酒滿眼欲歸心

發館陶

促轡數殘更似聞鷄一鳴春風馬上夢沙路月中行  
笳鼓遠多思衣裘寒始輕稍知田父穩燈火閉柴荆

王村

晝靄王村路春風北使旗塵催輕騎走寒咽短簫吹攬  
轡聯貂帽投鞭各酒卮紛紛小兒女何事倚牆窺

長垣北

攬轡長垣北，貂寒不自持。  
霜風急鼓吹，烟月暗旌旗。  
騎火流星點，牆桑亞戟枝。  
柴荆掩春夢，誰見我行時。

冬日

擾擾今非昔，漫漫夜復晨。  
風沙不貸客，雲日欲迷人。  
散髮愁邊老，開顏醉後春。  
轉思江海上，一洗白綸巾。

壬辰寒食

客思似楊柳，春風千萬條。  
更傾寒食淚，欲漲冶城潮。  
巾髮雪爭出，鏡顏朱早凋。  
未知軒冕樂，但欲老漁樵。

雨中

尚疑櫻欲吐已怪菊成漂  
紫萸凌風怯青苔挾雨驕  
長閒故有味多難自無聊  
牢落柴荆晚生涯付一瓢

宿雨

綠攪寒蕪出紅爭暖樹  
歸魚吹塘水動鴈拂塞垣  
飛宿雨驚沙盡晴雲晝漏  
稀却愁春夢短燈火著征衣

乘日

乘日塞垣入御風塘路  
歸胡皆躍馬去鴈却背人  
飛烟

水吾鄉似家書驛使稀  
忽忽照顏色恨不洗征衣

秋露

日月跳何急荒庭露送秋  
初疑宿雨泣稍怪曉霜稠  
曠野將馳獵華堂已御裘  
空令半夜鶴抱此一端愁

還自河北應客

媿客問謠俗舊傳今自如  
材難知驥馬味美賽河魚  
塞水移民久川防動衆初  
北人雖異論時議或非疎

將次洺州憩漳上

漠漠春風裏  
茸茸綠未齊  
平田鷓鴣散  
啄深樹馬迎嘶  
地入河流曲  
天隨日去低  
高城已在眼  
聊復解輕齋

和仲庶夜過新開湖憶沖之仲涂共泛

水遠浮秋色  
河空洗夜氛  
行隨一明月  
坐失兩孤雲  
露

髮此時濕  
風顏何處醺  
淹留各有趣  
不比漢三君

白樂天有

二處成孤雲之句

送契丹使還次韻荅淨因老

老欲求吾志  
時方撫我華  
強將愁出塞  
空得病還家  
日

轉山河暖風含草木葩勝遊思一往不敢問三車

送吳叔開南征

摻袂不勝情犀舟擊汰行倦遊無萬里惜別有千名春  
草淒淒綠江楓湛湛清金陵多麗景此去屬蘭成

遊棲霞庵約平甫至因寄

渺渺林間路蕭蕭物外僧高陰涼易入閒貌老難增官  
事真傷錦君恩更飲冰求田此山下終欲忤陳登

和棲霞寂照庵僧雲渺

平甫

蕭然一世外所樂有誰同  
宴坐能忘老齋蔬不過中  
無心為佛事有客問家風  
笑謂西來意雖空亦不空

宜春苑

宜春舊臺落日暮一登臨  
解帶行蒼蘚移鞍一作鞍坐綠

陰樹疎啼鳥遠水靜落花  
深無復增修事君王惜費金

春日

冉冉春行暮菲菲物競華  
鶯猶求舊友燕不背貧家  
室有賢人酒門無長者車  
醉眠聊自適歸夢到天涯



癸卯追感正月十五事

正月端門夜金輿縹緲中傳觴三鼓罷縱觀萬人同警蹕  
聲如在嬉遊事已空但令千載後追詠太平功

晚興和沖卿學士

剌剌風生晚娟娟月上初白沙眠綠驥清浪浴鱗魚竟  
欲從君飲猶便讀我書斜陽不到處牆角樹扶疎

秋興和沖卿

雲浮朝慘淡風起夜颼颼欲作冰霜地先迴草樹秋征

人倚笛怨思婦向砧愁為問隨陽鴈哀鳴豈有求

次韻沖卿除日立春

猶殘一日臈併見兩年春物以終為始人從故得新迎  
陽朝剪綵守歲夜傾銀恩賜隨嘉節無功祇自塵

題友人郊居水軒

田中三畝宅水上一軒開為有漁樵樂非無仕進媒  
槎頭收晚釣荷葉卷新醅坐說魚腴美功名挽不來

遊賞心亭寄虔州女弟

秀發千峰霽清涵萬里秋滄江天上落明月鏡中流眼  
與魂俱斷身依影獨留為憐幽興極不見爾來遊

江亭晚眺

日下崦嵫外秋生沆碣間清江無限好白鳥不勝閑雨  
過雲收嶺天空月上灣歸鞍侵調角回首六朝山

金山寺

重經高處寺一與白雲親樹木有春意江山如故人幽  
軒含氣象偏影落風塵日暮臨歸去徘徊欲損神

揖仙閣

結閣揖仙子疏塘臨隱扉  
水花紅四出山竹翠相圍  
雲度疑輶下鳬驚恐鳥飛  
蜀薑寧可待授釣此忘歸

舟夜即事

火炬臨遙岼餘光照客船  
水明魚中餌沙暖鷺忘眠  
感慨無窮事遲迴欲曉天  
山泉如有意枕上送潺湲

何處難忘酒

擬白樂天作

何處難忘酒英雄失志秋  
廟堂生莽卓巖谷死伊周  
賦

敘中原困干戈四海愁此時無一盞難遣壯圖休

二

何處難忘酒君臣會合時深堂拱堯舜密席坐皋夔和  
氣襲萬物歡聲連四夷此時無一盞真負鹿鳴詩

送孫子高

蕩漾江南客融怡席上珍一罇相別酒千里獨歸人客  
路貧堪病交情遠更親自慚兒女意失淚滴衣巾

送董傳

悠悠隴頭水日夜向西流行路未云已歸人空復愁文  
章合用世頭髮未驚秋一聽秦聲罷還來上國遊

寄深州晁同年

秀色歸荒隴新聲換氎毛日催花藥急雲避鴈行高駐  
馬旌旗暖傳觴鼓吹豪班春不知負短髮為君搔

白雲然師

白首一山中形骸槁木同苔爭庵徑路雲補衲穿空塵  
土隨車轍波濤信施工昏昏老南北應謝此高風

自白土村入北寺二首

木杪田家出城陰野迳分溜渠行碧玉畦稼卧黃雲薄  
槿烟脂染深荷水麝焚夕陽人不見雞鶩自成羣

二

雨過百泉出秋聲連衆山獨尋飛鳥外時渡亂流間坐  
石偶成歇看雲相與還會須營一畝長此聽潺湲

題朱郎中白都莊

蕭灑桐廬守滄洲寄一廬山光隔釣岬江氣雜炊烟藜

杖聽鳴舫籃輿看種田明時須共理此興在他年

史教授獨善堂

湖海十年舊林塘三畝餘靜非談者隱貧勝富人居列  
鼎亦何有幅巾聊自如猶應不獨善學子滿階除

寄福公道人

帝力護禪林滄洲側布金樓依水月觀門接海潮音開  
士但軟語遊人多苦吟曾同方丈宿燈火夜沈沈

身間



身閒宜晚食歲晏忌晨興人自嘲便腹吾方樂曲肱睡  
蛇雖不去夢虺已無憑寄語中林客思禪病未能

還家

還家豈不樂生事未應閒朝日已復出征鞍方更攀傷  
心百道水闕目萬重山何以忘羈旅脩然醉夢間

題湯泉壁示諸子有欲閒之意

吟哦一水上披寫衆峰間偶運非彭澤留名比峴山君  
才今禹稷家行古原顏平世雖多士安能易地閒

和唐公舍人訪淨因

西城方外士傳法自南華高蹈玩一世旁通兼數家來  
遊仁者靜傳詠正而葩乘興何時載還能託後車

沂溪懷正之

故人何處所天角浪漫漫寂寞斷音驛徘徊愁肺肝世  
情紛可怪旅況浩難安願化東南鵠高飛託羽翰

答許秀才

高陽有才子負笈求晨饁所趣少知者其詞多慨然樵

妻竟謝絕漂母嘗哀憐尚友古之人于今猶壯年

臨川文集卷十五

欽定四庫全書

臨川文集卷十六

宋 王安石 撰

律詩

五言八句

五言長篇附

次韻景仁雪霽

次韻范景仁二月五日夜風雪

次韻沖卿過睢陽

荅沖卿

得書知二弟附陳師道舟上汴

初憩和州

瘡起舍弟尚未已示道原

送杜十八之廣南

崑山慧聚寺次張祐韻

吳江

江

江南

賈生

還自舅家書所感

世事

寄純甫

招丁元珍

遊杭州聖果寺

京兆杜嬰大醇卒以詩二首傷之

江上二首

夏夜舟中頗涼因有所感

孤桐

遲明

陪友人中秋夕賞月

慎縣修路者

河勢

送河間晁寺丞

暮春

遊北山

吳正仲謫官得故人寄蟹以詩謝之余次其韻  
陳師道宰烏程縣

冬至

湯泉

讀鎮南邸報癸未四月作

擬和御製賞花釣魚

和吳沖卿雪霽紫宸朝

和吳沖卿集禧齋祠



送周都官通判湖州

雙廟

張巡  
許遠

和子瞻同王勝之游蔣山

送鄆州知府宋諫議

見遠亭上王郎中

次韻景仁雪霽

新聲生屋雷殘點著垣衣委翳無多在飄零不更飛  
坳中餘宿潤暖處自朝暉稍見青青色還從柳上歸

次韻范景仁二月五日夜風雪

何知此邂逅談笑接清揚對雪知春淺回燈惜夜長密  
雲通炫晃殘月墮冥茫故有臨邛客抽毫興未忘

次韻沖卿過睢陽

宮廟此神鄉留親泊楚艤天開今壯麗地積古悲涼不  
改山河舊猶餘草木荒還聞足賓客誰是漢鄒陽

荅沖卿

風作九衢黃南窓坐正涼破瓜青玉美浮萍白雲香詩

懶猶能強官閒肯便忘賢愚各有用尺寸果誰長

得書知二弟附陳師道舟上汴

兒童聞太丘邂逅兩心投與汝今為伴知吾不復憂園  
桃已解萼沙水欲驚舟一見南飛鴈江邊肯更留

初憩和州

衣足一囊弊粟餘三釜陳猶依食貧地已媿省煩人塵  
土病催老風波愁過春詩書今在眼還欲討經綸

瘡起舍弟尚未已示道原

側足呻吟地連甕瘡瘡秋窮鄉鑿自紉小市藥難求肝  
膽疑俱破筋骸漫獨瘳慚君遠從我契濶每同憂

送杜十八之廣南

東南炎海外尋訪又輸君過嶺猿啼暖貪程馬送曛清  
談消瘴癘秀句起烟雲及早來鄉薦薦朝廷尚右文

崑山慧聚寺次張祐韻

峰嶺互出沒江湖相吐吞園林浮海角臺殿擁山根百  
里見漁艇萬家藏水村地偏來客少幽興祗桑門

吳江

莽莽昔登臨秋風一散襟  
地留孤嶼小天入五湖深  
柑橘無千里魚鰕有萬金  
吾雖輕范蠡終欲此幽尋

江

靈源開闢有羸縮但相隨  
逆折山能礙奔流海與期  
泥沙拆蚌蛤雲雨暗蛟螭  
欲問深何許馮夷祇自知

江南

江南春起施秋至尚波濤  
問舍才能定呼舟已復操  
行

歌付浩蕩歸夢得蕭騷冉冉欲何補紛紛為此勞

賈生

漢有洛陽子少年明是非所論多感慨自信肯依違死者若可作今人誰與歸應須蹈東海不但涕沾衣

還自舅家書所感

行行過舅居歸路指親廬日苦樹無賴天空雲自如黃  
焦下澤稻綠碎短樊蔬沮溺非吾意憫嗟聊駐車

世事

世事一何稠論心日已偷尚蒙今士笑宜見古人羞老  
圃聊須問良田亦欲求非關畏黷冤無責易身修

寄純甫

塞上無花草飄風急我歸梢林聽澗落卷土看雲飛想  
子當紅藥思家上翠微江寒亦未已好好著春衣

招丁元珍

默默不自得紛紛何所為畫墁聊取食獵較且隨時秋  
入江湖暗風生草樹悲黃花一杯酒思與故人持

遊杭州聖果寺

登高見山水身在水中央  
下視樓臺處空多樹木蒼浮  
雲連海氣落日動湖光  
偶坐吹橫笛殘聲入富陽

京兆杜嬰大醇能讀書其言近莊其為人曠  
達而廉清自托於醫無貴賤請之輒往卒也  
以詩二首傷之

蕭瑟野衣巾能忘至老貧  
避囂依市井蒙垢出埃塵  
接物工齊物勞身恥為身  
傷心宿昔地不復見斯人



二

叔度醫家子君平卜肆翁蕭條昨日事髣髴古人風  
舊宅雨生菌新阡寒轉蓬存亡誰一問嗟我亦窮空

江上

潮連風浩蕩沙引客淹留落日更清坐空江無近舟  
共看蕙葦宅聊即稻粱謀未敢嗟艱食凶年半九州

二

書自江邊使鄉鄰病餓稠何言萬里客更作百身憂  
補

敗今誰卹趨生我自羞西南雙病眼落日倚扁舟

夏夜舟中頗涼因有所感

扁舟畏朝熱望夜倚桅檣日共火雲退風兼水氣涼未  
秋輕病骨微曙浣愁腸堅我江湖意滔滔興不忘

孤桐

天質自森森孤高幾百尋陵霄不屈已得地本虛心歲  
老根彌壯陽驕葉更陰明時思解慍願斷五絃琴

遲明

歌枕浩無情  
蘧蘧獨遲明  
霜繁紅樹老  
雲澹素蟾清  
倦鵲猶三市  
寒雞未一鳴  
故山何處所  
應有曉猿驚

陪友人中秋夕賞月

海霧看如洗  
秋陽望却昏  
光明疑不夜  
清瑩欲無坤  
掃掠風前坐  
留連露下尊  
苦吟應到曉  
況有我思存

慎縣修路者

畚築今三歲  
康莊始一修  
何言野人意  
能助令君憂  
勗力非無補  
論心豈有求  
十年空志食  
因汝起予羞

河勢

河勢浩難測禹功傳所聞今觀一川破復以二渠分國  
論終將塞民嗟亦已勤無災等難必從衆在吾君

送河間晁寺丞

公孫富文墨名字世多知談笑取高第弦歌當此時臨  
河薪石費近塞繭絲移緩急常愁此看君有所為

暮春

春期行晚晚春意賸芳菲曲水應修禊披香未試衣雨

花紅半墮烟樹碧相依悵望夢中地王孫底不歸

遊北山

攬轡出東城登臨目暫明烟雲藏古意猿鶴弄秋聲客  
坐苔紋滑僧眠樾蔭清賞心殊未已山下日西榮

吳正仲謫官得故人寄蟹以詩謝之余次其

韻

越客上荆舫秋風憶把螯故煩分巨跪持用佐清糟飲  
量寬滄海詩鋒捷孟勞甘飡飽觴詠餘事付鈞陶

陳師道宰烏程縣

嘗聞太丘長德不負公卿墟墓今千載昆雲亦一城本  
懷深閉蓄餘論略施行故自有仁政能傳家世聲

冬至

都城開博路佳節一陽生喜見兒童色歡傳市井聲幽  
閒亦聚集珍麗各攜擎却憶他年事闌商閉不行

湯泉

寒泉詩所詠獨此沸如烝一氣無冬夏諸陽自廢興人

游不附火蟲出亦疑冰更憶驪山下款然雪滿塍

讀鎮南邸報癸未四月作

賜詔寬言路登賢壯陞庶相期正在治素定不煩占衆  
喜夔龍盛予虞絳灌儉太平詎可致天意慎猜嫌

擬和御製賞花釣魚

雲暖蓬萊日風酣太液春水光承步輦花氣入鈎陳伏  
檻留清蹕傳觴屬從臣霏香連釣餌落葉亂游鱗飲  
恩知厚衢樽賜願均更看追夏諺先此詠蓬辰

和吳沖卿雪霽紫宸朝

虎士開闔闔雞人唱九霄雲移銀闕角日轉玉廊腰  
簫動川收潦靴鳴海上潮舞袍沾宿潤拜笏擁殘飄  
賜飲人何樂歸嘶馬亦驕低徊但忘食吟咏得逍遙

和吳沖卿集禧齋祠

緘封祝辭密占寫御名真帝坐遙臨物星圖俯映人  
風含烟外節月點霧中茵沈藿升煙遠槐檀取燎新羽衣  
歸寂寞金鉞立逡巡却想來時路還疑隔一塵



送周都官通判湖州

綠水烏程地青山顧渚濱酒醪猶美好茶薺正芳新  
聚泛樽前月分班焙上春仁風已入俗樂事始關身  
橘柚供南貢楓槐望北宸知君白羽扇歸日未生塵

雙廟

張巡  
許遠

兩公天下駿無地與騰驤就死得處所至今猶耿光中  
原擅兵革昔日幾侯王此獨身如在誰令國不亡北風  
吹樹急西日照窓涼志士千年淚泠然落奠觴

和子瞻同王勝之遊蔣山并序

子瞻同王勝之游蔣山有詩余愛其峰多巧障日江遠  
欲浮天之句因次其韻

金陵限南北形勢豈其然楚役六千里陳亡三百年江  
山空幕府風月自觥船主送悲涼岸妃埋想故蓮臺傾  
鳳久去城踞虎爭偏司馬壩廟域獨龍層塔顛森疏五  
願木蹇淺一人泉枕杖窮諸嶺籃輿罷半天朱門園綠  
水碧瓦第青烟墨客真能賦留詩野竹娟

送鄆州知府宋諫議

盛世千齡合宗工四海瞻天心初籲俊雲翼首離潛德  
望完圭角儀形壯陞廉徐鳴蒼玉佩畫校碧牙籤綸掖  
清光注鑾坡茂渥霑文明誠得主政瘼尚煩砭右府參  
機務東塗贊景炎廟謨資石畫兵略倚珠鈴坐鎮均勞  
逸齋居養智恬謳謠喧井邑惠化穆蒼黔進律朝章舊  
疏恩物議僉通班三殿遽徙部十城兼申甫周之翰龜  
蒙魯所詹地靈奎宿照野沃汶河漸首路龍旗盛提封

虎節嚴賜衣纏紫艾衛甲綴朱綬海谷移文省谿堂燕  
豆添班春回紺幘問俗卷彤檐舟楫商巖命熊羆渭水  
占治裝行入覲金鼎重調鹽

見遠亭上王郎中

高亭豁可望朝暮對谿山野色軒楹外霞光几席間樹  
侵蒼靄沒鳥背夕陽還草帶平沙濶烟籠別戍間圃畦  
荷氣合田徑燒痕斑樵笛吟晴塢漁帆出暝灣登臨及  
芳節宴喜發朱顏夾砌陳旌旆褰簾進佩環觀風南國

最應宿紫宸班康樂詩名舊蕪音詎可攀

臨川文集卷十六